



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Edisaun: Marsu 2010

Periodu: Marsu 2010

PROPOSTA LEI KONTRA VIOLÉNSIA DOMÉSTIKA PASA IHA GENERALIDADE HO VOTUS MAIORIA

Iha loron 22 fulan Marsu 2010, Proposta Lei Kontra Violénsia Doméstika no 31/II/2009 pasa iha votasaun generalidade ho votus maioria afavor iha Palamentu Nasional. Maske proposta ne'e sei loron ba iha sesaun espesializadu, maibe JSMP simu rezultadu ne'e ho laran kontente, tanba hatudu katak buat ne'ebé durante ne'e grupu fetu sira luta hetan ona ninia rejultadu positivu husi deputadus sira. Liu-liu vitima sira hosi krimi violencia domestika hetan ona dalan oinsa atu prosesa sira nia kazu no oinsa bele hetan apoiu integradu hosi entidades ka instituisaun kompetente tuir lei ne'e haruka.

Antes ne'e, iha loron 19 fulan Marsu 2010, Sekretaria Estadu ba Asuntu Promosaun Igualidade (SEPI) hamutuk ho Komisaun A iha Parlamentu Nasional apresenta ona Proposta Lei Kontra Violénsia Doméstika. Iha apresentasaun ne'e Sekretaria Estadu ba Promosaun Igualidade subliña katak Lei ne'e nia objetivu atu kria no hametin prevensaun ba violencia domestika no atu hametin unidade iha familia. Sekretariu Estadu ne'e mos hateten katak tuir Kódigo Penal Timor-Leste (artigu 154) violencia domestika hanesan krime publiku ho ida ne'e hatudu katak violencia domestika laos **"bikan ho kanuru mak baku malu"**.

Wainhira mosu Proposta Lei Kontra Violénsia Doméstika iha antusiasmu maka`as tebes husi organizasun fetu no organizasaun sira ne'ebé mak durante ne'e luta ba igualidade generu, ho advokasia ne'ebé forte. Grupu barak, liu-liu Grupu DV Law halo advokasia liu husi fahe brosur, booklet, kamizola, atu hasae konsensia publiku hodi hamutuk hamenus violencia kontra fetu iha rai laran, nomos hala`o aktividade ne'e liu husi treinamentu.

Tuir konsultasaun publiku ne'ebé halo husi Komisaun A iha distritu sira, iha populasun balu mak iha pozisaun pro no kontra kona-ba Proposta Lei Kontra Violénsia Doméstika. Iha ema barak mak dehan Proposta Lei ne'e sedu liu atu aplika iha nasaun Timor-Leste ne'ebé foin mak ukun rasik aan. Maibe tuir WJU nia hanoin, realidade ne'ebé iha hatudu katak ita presija duni Lei

Kontra Violéncia Doméstika, tanba iha kazu barak mak akontese, no fetu ho labarik mak sempre sai vitima ba hahalok violensia hirak ne'e.

Aleinde ne'e, wainhira iha prosesu diskusaun ba Proposta Lei refere iha Parlamentu Nasional, deputadus balun la konkorda ho lei ne'e. Bazeia ba apresentasaun husi Sekretaria Estadu Promosaun Igualidade, sira hateten katak lei ne'e ba fetu ho labarik deit, maibe iha realidade iha mos fetu halo violensia ba mane. Maske nune'e, iha mos deputadas balu mak hateten katak lei ne'e fo benefisio ba membru familia tomak. Aleinde ne'e, ema barak sempre kestiona katak wanhira lei ne'e iha, sei hamosu divorsio. Maibe deputadas sira seluk resposta katak lei ne'e iha atu haburas unidade no domin iha familia laran.

Iha diskusaun ne'e iha deputadus barak mak la konkorda ho Proposta Lei Kontra Violéncia Doméstika. Maibe iha Segunda-feira, dia 22 Marsu 2010 Sekretaria Estadu Promosaun Igualidade hato'o resposta ba duvidas no komentario ne'ebé mai husi duputadus sira. Depois de halo votasaun ba generalidade hatudu katak maioria deputadus hamutuk nain 40 maka vota afavor no nain 2 mak vota abstein ba Proposta Lei Kontra Violéncia Doméstika.

JSMP nia hanoin, eventu ne'e konsidera nudar eventu ida ne'ebé importante tanba ho ida ne'e hatudu katak buat ne'ebé durante ne'e ita luta hetan ona ninia rejultadu positivu. Maske sei iha faze seluk ba prosesu ne'e, ita hotu espera katak lei ne'e bele pasa iha vota espesialidade no bele promulga husi Prezidente da Republika. Hein mos katak, wainhira Lei Kontra Violéncia Doméstika ne'e promulga ona, tenque iha sosialisasaun maximu, atu nune'e labele iha interpretasaun sala kona ba Lei ne'e, liu-liu iha area rurais.

JSMP kongratula Distintus Membru Parlamentu Nasional hotu, liu-liu ba Komisaun A. Maske iha ideas pro no kontra iha prosesu diskusaun ba Proposta Lei Kontra Violéncia Doméstika, maibe ikus mai Proposta Lei Kontra Violéncia Doméstika pasa ona ba generalidade ho votus maioria. JSMP mos kongratula Sekretaria Estadu Promosaun Igualidade no ekipa tomak inklui equipa legal ne'ebé durante ne'e ho esforsu tomak halo konsultasaun ba Proposta Lei Kontra Violéncia Doméstika ho prosesu ne'ebé naruk ikus mai bele pasa iha vota generalidade.

Atu hetan informasaun kle'an favor kontaktu:

Luis de Oliveira Sampaio

Director Ezekutivu JSMP

Diresaun E-mail luis@jsmp.minihub.org

Landline: 3323883